

東
華
續
錄

東華續錄

乾隆三十五

臣王先謙敬編

臣周瀚蕃恭校

乾隆十七年壬申春正月甲子撥倉米四百石給左右翼米局平
糶○壬申諭各省每年完欠錢糧俱著奏銷時覈奏○乙亥準噶
爾台吉喇嘛達爾扎奏前遣使臣額爾欽尼瑪將前往西藏聘請
喇嘛之事具奏蒙恩准於再遣使臣入貢時延請有德行喇嘛四
五人前來教誨眾喇嘛不勝感激今遣使臣圖卜濟爾哈朗進貢
並延請喇嘛懇於呼圖克圖三人內恭請一人於推廣黃教實有
裨益並祈仍照前奏許令我處遣人輕騎減從前往西藏爲我先
人設懺進供所有沿途派撥官員兵丁照看等事雖覺繁瑣但已
蒙恩和好而遣往之人爲數無幾尙屬易行使遠近聞知無不仰

慕盛德其貿易之事令使臣口奏奏入賜喇嘛達爾扎敕書曰據
台吉奏懇於呼圖克圖三人內延請一人前往爾處推行黃教並
懇准爾處遣人至藏進供等語去年爾使額爾欽尼瑪來以延請
喇嘛之事具奏朕已明降諭旨我中國呼圖克圖三人及有德行
喇嘛俱有教習學藝之事不可遣往但朕不忍令爾處黃教滅絕
故特許於西藏揀選有德行喇嘛到京俟爾再遣使來准令請往
是時降旨後朕卽令達賴喇嘛揀選精於經呪可以推行黃教之
喇嘛十人送至京師今爾不遵朕旨反以斷不可遣往之呼圖克
圖爲請是爾並非真心推行黃教可知况西藏選來之喇嘛爾來
使亦曾會面以未奉爾命不敢延請朕自去年卽挑藏內喇嘛至
京以待爾之延請今爾使旣至又不請往是爾原無請喇嘛之意
今併此喇嘛十人亦不遣往矣至爾奏遣人至藏一事去年爾使

臣額爾欽尼瑪來時以爾襲位爲辭朕旣降旨必無換一台吉卽遣人進藏一次之理今來使又以追報爾父噶爾丹策零爲辭果爾則從前策旺多爾濟那木扎勒已經爲爾父熬茶一次安得今又差人前往設有子十人將十次差人進藏乎來使又奏使臣來往請不限人數肅州貿易牲畜內不好者准其售賣等語從前我大臣與爾使臣哈柳定議有事差人不攜買賣後因每次遣來使臣俱託言豫備口糧攜帶貨物漸漸加增本應不准貿易勒令帶同朕因和好是以施恩來使令照尼瑪所帶貨物爲準其人數若不限定日久亦難遵行故亦令以五十人爲準至肅州貿易復加恩准照乾隆十三年最多之數貿易一節原係小人謀利之事爾等攜來不堪之物慮我中國之人不用若我中國之人將不堪之物給爾等爾等肯受乎此事瑣屑朕所不問卽我封疆大臣亦不

屑辦理爾何必以此瀆奏來使又以逃走之薩喇爾賜回爲請薩喇爾雖來自爾處實因懼禍逃生朕爲天下大皇帝以生成眾生爲本豈肯轉置之死地況我中國逃至爾處如羅卜藏丹津者甚多若一一索取不可勝計朕並不索取一人卽爾送至朕亦不受朕以爲既往之事不忍深究爾反求給回甚屬錯誤爾若念爾父恭順和好年年遣使請安受朕恩典事屬可行若以此等斷不可行之事瀆奏究屬無益是以特降飭旨令爾使圖卜濟爾哈朗齎歸諭爾知之○己卯盛京禮部侍郎德齡奏請終養允之○庚辰諭盛京包衣三旗佐領等官皆係職分相等之員並無統領辦事之人難保無互相推諉及掣肘遺誤之處盛京地方最爲緊要應行設一總管內務府大臣專轄將此永著爲令見應增設之缺著將軍阿蘭泰兼管○癸未諭據江西巡撫鄂昌參奏廣饒九南道

施廷翰之子施奕度傳鈔僞稟該道是否知情非加確訊不能得實請解任審究等語從前河庫道李宏係長隨管工人等私和傳鈔經該督參奏是以降旨解任質審及訊明並不知情卽予開復今施廷翰身爲巡道稽查是其專責乃伊子施奕度將此等逆稟展轉傳播失察之咎實所難辭且亦斷無不知情之理非李宏一案所可並論施廷翰著革職交與該撫一併審究具奏○諭軍機大臣等從前曾降旨傳諭各省督撫等凡陳奏內應行交部事件俱不必將寄諭之旨敘入今新柱定長會奏審擬思陵土目羅文立等越界圖占夷田捏報夷人拔竹毀牆一案旣據聲明例應繕疏具題因封印在卽不及繕本是以恭摺具奏等語是此奏卽應交部覈擬者乃摺內仍將寄信諭旨裝敘殊屬不合已命軍機大臣節去鈔發著傳諭知之○定邊左副將軍親王成袞扎布奏據

防卡驍騎校齊克慎報稱準噶爾宰桑瑪木特等遣人來告稱達瓦齊作亂在納林布魯爾地方被我兵殺敗達瓦齊與阿睦爾撒納等十二人逃出不知去向是以我台吉令阿爾台等處遊牧宰桑三人帶兵往烏蘭大坂努克穆隆都什託羅海華碩羅圖洪郭爾鄂隆舒魯克圖得樓等七處隘口駐紮以防達瓦齊與阿睦爾撒納遠遁恐各卡疑我無故動兵特來告知等語又據蒙古管旗章京莫尼扎卜前往烏梁海確訪信息有準噶爾人至烏梁海探親告稱達瓦齊於去年九月內與台吉喇嘛達爾扎有隙私與台吉達什阿睦爾撒納班珠爾策凌沙克都爾等商議投順 大皇帝其後達什沙克都爾反將商議之事告知喇嘛達爾扎卽帶兵追趕與達瓦齊戰敗而同達瓦齊又與阿睦爾撒納班珠爾等商議若投中國恐阿爾台地方有兵堵截地狹難過因向額爾齊斯

前赴哈薩克等語諭軍機大臣等準噶爾向多詭詐伊等如果慮達瓦齊逃竄不過派兵防守足矣今反遣人來告殊屬可疑此或伊等恐我處生疑故爲安慰卻暗行譎計猝然闖入我境亦未可知聞喀爾喀遊牧多有距卡座甚近者今若不豫籌防範恐賊人一旦竊發不暇向內收移將反令其得利所有附近卡座之喀爾喀遊牧應早令收入腹地地方安然此時遽使移徙又不免起眾人驚疑且或賊人聞知轉以我爲畏懼此中宜緩宜急應如何熟計妥辦甚關緊要今派尙書舒赫德侍郎玉保前往軍營查看軍容器械著傳諭成袞扎布俟伊等到時會商密議務期籌畫盡善定議具奏○丙戌諭河南山東修築歷年太行隄○丁亥諭前因和其衷於傳鈔偽棄一案聽從幕賓劉宏謨干請遂復隨同隱匿居心巧詐是以革職拏問交部定擬今旣據官貴震等到案審明劉

宏謨原係妄供和其衷並未聽其干請則和其衷之事前隱匿尙屬屈於上司其罪與雋泰有閒和其衷著加恩從寬釋放○己丑以沈嘉徵爲雲南按察使由迤西道遷

二月乙未舒輅卒以鍾音爲陝西巡撫調三和爲戶部侍郎以德

保爲工部侍郎

由內閣學士遷

○丙申以吳達善爲盛京禮部侍郎

由內閣學士

○戊戌諭故禮部尙書韓莢種學績文湛深經術其所撰制義

清真雅正實開風氣之先足爲藝林楷則從前未邀易名之典著

加恩追諡用示褒榮大學士等具擬以聞尋予諡文懿○己亥

上御經筵○諭準泰之罪業經寬赦卽著釋放○ 皇十一子永

理生○辛丑諭喀爾吉善等所奏傳鈔偽棄案內浙江提督衙門

書吏包琳供係從前提督內衙傳出提臣吳進義始終隱匿今旣

詢出實情必須向吳進義根問內衙原棄來歷方可從此逐層根

究等語吳進義身爲大臣乃任家人胥役傳播僞稟仍復有心隱

諱殊屬負恩已降旨解任所有應行質詢之處著督撫等嚴行根

究據實奏聞○以定邊左副將軍成袞扎布之弟公車布登扎布

爲扎薩克另編佐領○以卞塔海蘇章阿俱爲內閣學士

卞塔海寺卿蘇章阿由內閣侍讀學士遷○甲辰諭向例各省鄉試巡撫入闈監臨而藩

臬二司則充提調監試之任後以藩臬爲通省錢穀刑名總匯改

用道員而巡撫之監臨如故所以重試典也但巡撫膺封疆之寄

職守甚重其督撫同城者尙有總督可以綜理若專係巡撫駐紮

省分及雖與總督同城而該督因事他出則止巡撫一人在省循

例入闈於地方不足以示彈壓嗣後此等省分應於藩臬二司內

酌委一員入闈監臨巡撫於三場點名時仍督同藩臬按查則賓

興大典旣爲嚴密而封疆專寄亦昭慎重矣○甲寅 上啓鑒謁

東陵○諭軍機大臣等前因喀爾吉善等奏到浙省查辦傳鈔

偽稟案內有由提督內衙傳出之語已降旨將吳進義解任今據

吳進義奏到包琳一犯又經自縊斃命著將原摺鈔寄喀爾吉善

雅爾哈善令將該犯是否自縊抑圖滅口了事之處秉公確查務

得實在情形詳悉奏聞尋覆奏吳進義以爲稟由伊內衙傳出曾

屬令包琳不可供明來歷及解省質對包琳勢難抵賴遂直供實

情又慮獲罪遂情急自縊實無滅口了事之處報聞○丙辰諭軍

機大臣等據班第等奏稱布魯克巴之額爾德尼第巴博羅特色

勒都卜聞朕加恩於達賴喇嘛撫定土伯特眾生抒誠內向進貢

方物等語布魯克巴乃遐方部落聞朕安撫西藏眾生傾心悅服

奏請朕安甚屬可嘉著施恩賞賚以示褒獎○丁巳 上謁 昭

西陵 孝陵 孝東陵 景陵○諭軍機大臣等浙省傳鈔偽稟

案內仇英供係提督內衙傳出應將吳進義家人究明來歷今據吳進義前後具摺奏辨以承審官逼令畫供已成冤獄請特派大臣審訊等語僞撰逆稟本出情理之外在吳進義身受厚恩若謂此稟竟出伊手朕可保其必無是事但伊本屬武人年已衰老文移案件豈能一一過目或由提塘以新聞稟報吳進義不加檢點自有應得之咎若併此俱欲洗刷淨盡轉非實在情形若謂喀爾吉善與之不協亦何必藉此大案授意問官株連文致且平日亦未見其有不協之處何值特派大臣赴審駭人聽聞朕看來吳進義不過如此是以從前降旨止以年老解任不因關涉僞稟卽行革職治罪也著喀爾吉善將此旨傳諭吳進義知之若有別情亦令喀爾吉善據實直奏不可迴護○辛酉直隸總督方觀承奏遵旨相度金陵在房山縣北崇山之內金太祖陵前地基稍寬應增

修享殿一繚以圍牆立正門其原有之祭臺甬路階砌等項並加修治金世宗陵前地隘應增修享殿一並祭臺圍牆甬路等項不能立正門今就碑亭接建柵欄立兩角門足符體制並將自房山北門至金陵山路二十里一併修治奏入報聞

三月丙寅

上回鑾

○戊辰汪德馨以營私革職以沈偉業爲廣

東按察使

由湖南鹽

○庚午

上還宮

○辛未諭前將查倉未能

盡心之王大臣等議處今據宗人府奏稱將和親王或革退都統或罰都統俸餉之處兩議請旨夫查倉並非都統專任因派出王等有兼轄都統者方可革退都統若派無兼轄之王亦將伊之王爵革退乎如果係兼轄任內之事自應視其所管之職議處查倉並非都統專任伊等若云不知亦應卽議革退都統何又兩議請旨宗人府王公等明知事例故意嘗試甚屬取巧伊等照例定議

朕或施恩亦未可定今如此瞻徇豈受其請託耶抑借以傾陷耶
大凡施恩治罪朕自有定見誰敢任意輕重從前 皇考時似此
嚴諭議處之事該王公等未有如此兩議請旨者將視朕爲何如
主敢如此嘗試耶著將宗人府王公等交該部嚴加議處具奏○
乙亥 上親耕藉田○戊寅諭潘思渠簡任巡撫實心貶勉今患
病湊近深爲軫惜著照江蘇巡撫徐士林之例入京師賢良祠以
示優卹其遺摺內所請封典貲贈之處著加恩賞給一品封典所
有應得卹典亦著加恩照一品之例賞給尋予諡敏惠○調陳宏
謀爲福建巡撫以蔣炳爲河南巡撫○己卯諭都察院此所議宗
人府王公處分又屬觀望全不實心前因宗人府議處和親王弘
書以兩請具奏瞻徇取巧是以特命都察院嚴察議處夫議者議
其罪也且八議之義全焉王公等非干大故從無革去王爵降爲

庶人之理都察院果以此議爲當乎否乎亦不過云如此議上必不依議另定處分而已卽云比較臣工瞻徇取巧之例應革職則王等本由宗令宗正任內議事獲罪亦應議革宗令宗正之職於革去親王何有是明知朕必不革去兩親王兩郡王而故如此立議以爲可以立身無過而於朝廷之體制事理之當然槩不之論是豈大臣實心敬事之道朕辦理庶政務協厥中從寬從嚴毫無成見乃諸臣議事一不衷之於理非以嘗試取巧則以從重而恩出自上爲自全之術無以實心爲國家任事者朕將奚望亦甚自慚此案亦不必再交另議裕親王廣祿履親王允禩慎郡王允禧順承郡王泰斐英阿俱著罰王俸一年足矣其都察院官交該部嚴加議處具奏尋吏部議上得旨梅穀成績德廣成胡寶琮舒敏戴章甫常海王應綵俱著革職從寬留任陳惠華著從寬免其革

任仍註冊○辛巳諭朕恭閱 太宗文皇帝實錄內載崇德元年十一月癸丑日 上御翔鳳樓集諸親王郡王貝勒固山額真都察院官命宏文院大臣讀大金世祖本紀 上諭眾曰爾等審聽之世宗者蒙古漢人諸國聲名顯著之賢君也故當時後世咸稱爲小堯舜朕披覽此書悉其梗槩殊覺心往神馳耳目明快倍加歎賞朕思金太祖太宗法度詳明可垂久遠至熙宗合喇及完顏亮之世盡廢之耽於酒色盤樂無度效漢人之陋習世宗卽位奮圖法祖勤求治理惟恐子孫仍效漢俗豫爲禁約屢以無忘祖宗爲訓衣服語言悉遵舊制時時練習騎射以備武功雖垂訓如此後世之君漸至懈廢荒其騎射至於哀宗社稷傾危國遂滅亡乃知凡爲君者耽於酒色未有不亡者也先時儒臣巴克什達海庫爾纏屢勸朕改滿洲衣冠效漢人服飾制度朕不從輒以爲朕不

納諫朕試設爲此喻如我等於此聚集寬衣大袖左佩弓右挾矢
忽遇碩翁科羅巴圖魯勞薩挺身突入我等能禦之乎若廢騎射
寬衣大袖待人割肉而後食與尙左手之人何以異耶朕發此言
正爲子孫萬世之計也在朕身豈有更變之理恐日後子孫忘舊
制廢騎射以效漢俗故當切此慮耳我國士卒初有幾何因嫻於
騎射所以野戰則克攻城則取天下咸稱我兵曰立則不動搖進
則不回顧威名震懾莫與爭鋒此番往征燕兵出邊我之軍威竟
爲八大臣所累矣故諭爾等其謹識朕言欽此朕每敬讀 聖謨
不勝欽懍感慕深惟國家開創之時我 祖宗躬親勞瘁勤求治
理矩矱相傳罔敢踰越以立萬世之丕基至於今咸受無疆之福
者皆仰遵 明訓所致也我朝滿洲先正遺風自當永遠遵循守
而勿替是以朕常躬率八旗臣僕行圍較獵時時以學習國語熟

練騎射操演技勇諄切訓誨無非率由舊章以傳奕禩永縣福祚
惟是我 皇祖太宗聖訓所垂載在 實錄若非刊刻宣示則累
朝相傳之家法外廷臣庶何由共悉且自古顯謨令典多泐之金
石曉諭羣工我 皇祖太宗之睿聖特申告誡昭示來茲益當敬
泐貞珉永垂法守著於紫禁箭亭御園引見樓及侍衛教場八旗
教場各立碑刊刻以昭朕紹述推廣至意俾我後世子孫臣庶咸
知滿洲舊制敬謹遵行學習騎射嫻熟國語敦崇醇樸屏去浮華
毋或稍有怠惰式克欽承 彝訓冀億萬世子孫共享無疆之祚
焉○甲申以李世倬爲左副都御史由大理寺卿遷○丙戌浙江巡撫雅
爾哈善奏遵旨傳提吳進義到案檢齊原供並各犯嚴究眾供一
詞俱稱僞稟係吳進義內衙傳出卽伊幕友家人亦俱供認於上
年四月二十二日誤發而傳鈔聚看各犯並取供後自縊之包琳

均係該衙門書辦吳進義於事敗後逐犯傳屬用言慰嚇令勿供傳自內衙意欲誘卸於史善墨一犯請將吳進義革職以便嚴行根究得旨吳進義已經解任不必另降諭旨發部卽著照所請行汝咨部知之○庚寅 上詣 黑龍潭祈雨

夏四月丙申諭宗人府所奏王公等朝期摺內康親王屢次註寫患病康親王年近八旬步履艱難亦係實情著加恩免其入朝嗣後王公內有年至七旬者卽照此例○壬寅諭軍機大臣等喀爾吉善奏到溫台屬縣奸民強搶米石見委道府究明爲首之人用大枷枷號徧遊城鄉兩月滿日仍行收禁按律從重定擬等語此等強搶爲首之犯鼓惑鄉愚肆行不法最爲地方之害必當示以重懲方足禁遏刁風卽其罪不至死亦不可拘泥常例僅予枷號兩月應令永遠枷號俟一二年後酌量省釋奸民庶知儆惕大凡

搶奪之案多由富民居奇閉糶而起地方官遇有災傷卽當先期一面勸諭富民出所有餘通融平糶一面密爲彈壓保護使兩得其平則奸民無可乘之機地方自必甯靜迨搶奪已行執法而繩其後富者被劫貧者受刑所傷實多已無及矣至事後辦理過嚴則以求生迫急之災黎罹於刑憲實可惻惻過寬則強梁縱肆之徒一呼百應更慮釀成事端該督撫辦災時當一一豫向司道明示此意使董率屬員善爲體悉方合機宜見在青黃不接之時尤當時時留心將此諭喀爾吉善知之○甲辰命截留浙江漕糧四十萬石江西漕糧二十萬石湖廣漕糧十萬石抵補動撥倉儲○丙午閩浙總督喀爾吉善等議覆御史歐陽正煥請開南田墾田畝一摺此墾孤懸大海直接外洋距甯波府屬之象山縣並台州府屬之甯海縣洋面五六十里至數百里不等內有三十餘墾外

有平沙總名南田元季流民曾耕墾其閒後爲洋匪剽劫又因地
近日本至明初卽行封禁迄今四百餘年民人屢請開墾厯任督
撫委勘利少害多是以未允臣等細加查訪實有應禁而不應開
者緣塗墁可墾之地統計不及七十餘頃而山徑磽田必須築塘
蓄水懸海坦沙又須砌礮禦鹹霖雨有砂壓水衝之患晴霽有旱
乾之虞卽雨暘時若而風潮之激盪鹹氣之薰蒸收穫難必且外
洋招墾多係無藉之徒千百成羣難保不爲盜匪若安營防守不
特官廨營房餉糈雜費該地賦稅不數十之一二抑且門戶錯雜
沙塗平坦設險尤難並非舟山玉環等處有山谿之限者可比况
旣經招墾則日用米糧硝磺鹽鐵卽應聽其販運守口員弁無從
分別更難保奸宄之徒必無出洋濟匪之事下軍機大臣議並傳
歐陽正煥閱詢尋奏喀爾吉善等議覆一摺交該御史閱看並訓

其是否確有所見據稱乾隆十五年因奉差至浙詢及地方人稱田少情形得聞南田墾可墾之土甚多因復細訪南田見屬象山初不等海外棄地國家承平海疆甯靖一經開墾則居民所在更成土著至於築塘蓄水本農功所不廢安營設汛又國制之自然苟慮法所難稽則見在非無防守且道塗平坦卽召民耕種亦不至聚集爲奸竊以玉環舟山等處前督臣李衛奏請開墾在雍正六七年閒其未墾以前固猶今之南田墾耳惟地方官以身任事自於民生有裨今該督撫亦稱宜禁而不宜開則原非無阡陌之利可知正煥雖係得之傳聞亦再三細訪初未敢冒昧陳奏然實未身履其地等語查該御史雖似有所見而實未身履其地方今生齒日繁地無遺利況南田近在內洋與海疆無關自可聽民開墾然自明初封禁至今已閱四百餘年卽前督臣李衛奏請開墾

玉環舟山二處而此獨未經講求者亦必確有不便之處今喀爾
吉善等既稱細察形勢不應開墾臣等愚見似毋庸再行查辦報
聞○庚戌湖廣總督永常奏羅田縣奸民馬朝柱等勾眾爲匪臣
撥兵按緝匪黨潛居江省英山縣之天馬寨當卽兼程親赴交界
恐各處居民不免驚擾因揭示徧發羅田蘄州廣濟黃梅等州縣
並諭被誘入夥者許首出自新能擒首從要犯從重獎賞嗣各處
獲犯一百餘名單提要犯馬朝柱之母妻子姪研訊據供尙有頭
目張錫玉朱元成吳承雲李永爵卽李開花等在四川峨嵋山西
洋寨餘黨散布江南桐城太湖亳州河南汴梁等處查馬朝柱假
捏神符勾結匪黨散札招軍積糧製械種種悖逆罪不容誅幸及
早敗露見已多半就獲臣嚴飭所屬分路窮搜務期速竣並咨四
川江南河南各督撫嚴密訪拏無使滋蔓卽日前赴天堂天馬二

寨相度善後之計得旨覽奏甚屬可嘉但正犯尙未就擒卿宜盡心按捕尹繼善亦奏稱前往汝二人若得會面將兩省交界藏奸之處悉心詳議以杜後患更爲周備也又諭永常奏到羅田縣奸匪馬朝柱勾眾爲逆一案已將該犯家口拏獲且經親赴羅田縣督辦等語江南按山兵役曾否捕獲匪黨並所稱山寨情狀若何改光宗親至其地必有確見此案發覺由蘄州知州李琰已傳旨嘉獎其羅田縣知縣馮孫龍乃謂馬朝柱等開荒燒炭獲利近居好事之徒捏稱伊等聚眾垂涎爭占冀以此消弭重案免地方失察之咎此等奸匪雖不足道而星星之火可以燎原若不於未發之先急爲查辦迨其後有所舉動則貽害地方良民之受荼毒者必多矣州縣中於所屬地方稽查奸宄發於未行保境安良卽當加恩顯擢其畏蒞避事粉飾養奸實足貽害地方必當置之重典

不可姑容爲上司者樂聞恬熙無事之言未有不爲所愚惑者將此傳諭尹繼善令其督率該地方官竭力速行辦理但此時尙宜密之不可洩漏○丙辰 皇十二子永璿生

五月癸亥諭據湖廣總督永常巡撫恆文摺奏黃州府屬之羅田縣與江南英霍二邑山谷毗連有奸民馬朝柱等藉名開山燒炭住居深嶺假捏神符勾連匪黨製械積糧陰圖不軌該督等密飭文武員弁前往查拏並咨行江省於所屬山境派撥弁兵協同搜捕永常尹繼善俱親往該處督率辦理先後拏獲奸匪家屬及黨羽人等起出軍械硝磺等物永常勇往辦理甚合機宜得封疆大臣之體尹繼善同心協力深屬可嘉方今國家全盛之時海隅日出咸樂享昇平此等匪民潛謀叛逆貽禍良善身任地方之責者一有所聞卽應迅速查辦務絕根株庶不致蔓延滋事儻有畏難

姑息之見俾得煽誘鄉愚恣行屯聚卽不難以兵力盡舉而殲旃而閭閻之受其擾累者已不可言矣羅田縣知縣馮孫龍初奉該督撫檄飭查勘意在粉飾了事輒以開山獲利均屬勞苦農民並無可疑形迹等情草率稟覆夫馬朝柱等自乾隆十五年潛住該處結黨聚眾伊旣漫無覺察及上司訪聞檄飭竟不親身赴寨確查轉以誑稟掩飾至已經敗露之際又不親往按捕以致首逆遠颺縱惡養奸莫此爲甚朝廷賞罰必在嚴明此等劣員若不立置重辟將來守土之吏亦何以責其捍災禦患而爲百姓除害乎且設使更有大於此案者其貽禍尙可問乎馮孫龍著拏交該處卽行正法並宣諭守令各官使果能身任其事勇往勦除未必卽至爲賊戕害縱或身撓賊鋒奉職而死國家酬庸之典必且加之優卹延及子孫而畏葸避事之徒思欲保全軀命終爲法所不容凡

有地方之責者均當以此爲戒總督永常著交部以軍功議敘總督尹繼善著交部議敘兩省在事文武員弁交各該督查明分別等次報部議敘其從前失察各員均著查明議處馬朝柱等均著各該地方嚴緝務獲已獲逆黨人犯除應俟逆首質訊定擬者仍牢固監禁外餘卽研訊確實分別情罪重輕按例定擬應正法者卽行正法應發落者卽予發落完結至該二省毗連山嶺險僻路徑錯雜處所應如何設法查禁防範卽著永常尹繼善會商速行定議奏聞事已就緒永常尹繼善亦不必久駐邊縣著回省○原任湖北巡撫晏斯盛卒遺疏聞並請卹封三代得旨晏斯盛患病溘逝知道了應得卹典該部察例具奏所請卹封之處著加恩賞給三代○丙寅諭廣東提督林君升山西按察使唐綏祖各奏請將本身及妻室應得封典卹贈高祖父母殊屬不合夫臣子封贈

之典以三代爲限此卽古者大夫三廟之義其貤封之例蓋專爲
二三品官不能封贈其曾祖父母四品以下不能封贈其祖父母
推廣錫類之恩以曲成其報本之意也若已得三代封典而又請
貤贈高祖父母是四代矣綸綍之錫上及三世臣子之分已爲極
榮更等而上之抑將何所限制乎向來文武一品大臣從無以此
陳請者誠知定分之不可踰也林君升本係武臣不知國體率意
陳奏尙無足責唐綏祖久歷中外曾任封疆何亦昧昧若是本應
交部以違例議處但念其希恩之請雖則非分而追遠之念尙屬
可原著傳旨申飭○乙酉嚴有禧因病解任以屠嘉正爲貴州按
察使

由湖北上
荆南道遷

○戊子發帑修河南武陟等五縣隄工

六月庚寅朔諭京察之年部院大臣各省督撫循例自陳求斥罷
候旨照舊供職此雖三載考績之義但卿貳職贊機務督撫任寄

封疆朕量材簡擢日復於懷其有不副委任或克稱簡畀者率已隨時黜陟斷無遑待三年之理凡可俟至京察解退者不過閒曹冷署年力衰昏而又非有大過介於可去可留之間者耳且身列大臣謬以斥罷爲辭是相率爲僞誠無謂也嗣自今內而部院司員外而道府京察大計之例仍舉行以昭激勸其自陳繁文著停止以示崇實武職五年軍政視此○壬辰諭蝗蟲害稼最烈皇考曾特降旨地方官不卽時撲滅者著革職拏問督撫嚴加處分載在令甲誠以捕蝗必用民力人力勝則蝗不成災故明示之禁使知所從事比者督撫養尊自逸且畏處分如方觀承蔣炳者非朕旨督責幾令捕蝗不力之劣員幸免矣夫忘人事而損田功上孤天貺奈何庇一二不肖劣員而貽數萬戶生靈之戚昔人所謂一家哭何如一路哭者甯未之聞耶牧令或委之業戶未報不思

官以知爲名則所治之一州一邑事無大小皆所當知必得受害者呼號始覺已不稱其名而療厥官矣彼卽不報爾何不知察耶卽恐致蹂踐且幸其飛食他境匿不具報愚民或有此情則償其所損又有成例如果明切開導家喻戶曉民卽至愚豈不計及蝗蝻初生甚微撲捕不過躡及溝畎隴隙無難補種且所失得償亦何憚而不報耶平日不講求禦害之方臨事又不身先督率徒事粉飾徇隱民飢罪歲咎孰大焉特用申明禁令各該督撫其嚴飭所屬敢有怠於奉行徇縱殃民者必重治其罪○諭侍郎錢陳羣因患病未痊奏請解任調理著准其解任派劉裕鐸前往診視俟秋涼起程回籍調理病痊後奏聞赴闕伊子編修錢汝誠著隨侍伊父抵家再行來京供職刑部侍郎員缺著王瀄補授仍兼管副都統○諭軍機大臣等近日督撫辦事有所謂上和下睦兩面見

好之祕鑰貌爲勇往任事以求取信而陰市私惠謂有旋乾轉坤之力使屬員心感尹繼善慣用此術方觀承及巡撫中一二能事者趨而效之惟策楞喀爾吉善黃廷桂尙存本色阿里袞亦不至此碩色更復不能諸臣心術才具日熟復於朕胸中任術取巧者皆洞見肺腑其何益之有大臣中有以取巧得利益者乎今日批示蔣炳摺奏切中時弊著因便鈔寄各督撫閱看○諭據江南提督武進陞奏稱上年八月閒崇明鎮奇營遊擊今升參將孫鼎元由松江謁見口稱有孫嘉淦條奏一事令其鈔稟來看未曾入告數月以來展轉思維寢食不安今又據吳進義供出由松江提塘陳公壽傳報請交部嚴加治罪武進陞已有旨諭令休致但孫鼎元係參將大員公然鈔傳僞稟武進陞閱看已經數月直至浙省咨拏提塘事不可掩始行入告該督撫見在查辦僞稟豈毫無聞

見乃並不據實奏聞此非尹繼善之取巧而何看來近來大臣辦事有所謂上和下睦兩面見好祕鑰貌爲勇往幹辦實心任事以求取信而陰市私恩取名譽以爲力能旋乾轉坤此尹繼善慣用之長技而近日如方觀承蔣炳一二能事之員皆趨效之朕已於蔣炳摺內批示著鈔寄各督撫閱看試思此等伎倆能逃朕洞鑒乎督撫用此術而得利益者何人乎莊有恭旣將提塘陳公壽壻獲亦不據實陳奏伊非他人可比若亦取巧一路何以承受朕恩典耶尹繼善莊有恭俱著傳旨申飭江省辦理僞棄之案前經降旨詢問尹繼善亦未覆奏著再行傳諭令其據實查奏尋奏五月十四日在浙撫雅爾哈善密咨拏松江提塘陳公壽臣深幸此綫一得江南提塘之凌祖耀江西提塘之章錦等俱可互勘得實親提嚴鞫矢口不承臣恐其因無實證茹刑狡供卽將該犯解浙質

審據浙撫咨稱陳公壽供出僞摺得自盤門外普濟堂之董事張世倫飭屬往查並無其人因浙撫咨內未詳敘陳公壽全供復專差守錄至今尙未覆到不敢妄奏得旨人孰無過能改卽無過矣勉之○癸巳諭臺灣彰化縣兇番戕殺兵民一案督提所奏據該地方文武稟報互異俱未得實情立柱錢琦見差巡察久之未奏因傳旨詢問並令察訪確情今立柱錢琦覆奏仍屬枝梧未得實情言官爲朝廷耳目况身處其地無難審察情僞乃僅據地方官稟報敷衍其詞並未親往察勘且稱初札商督撫會銜入告經駁回專摺具奏似此則巡察竟成冗贅於設官本意失之遠矣立柱錢琦著交部議處原摺並發看來臺灣文有道府武有鎮營足資彈壓巡察三年更替徒擁虛名事權則不如督撫切近又不加守令介在其間在有志向上者或以多事致敗而循分供職者多致

志氣墮頽或且歎爲擯斥外出也於公事殊無裨益所有巡察臺灣御史著三年一次命往事竣卽回不必留駐候代著爲例○癸卯諭滿洲大臣勤習騎射○丁未 御試翰林詹事等官擢汪廷瑛等三員爲一等試滿洲由部院改入翰林詹事等官擢德爾泰爲一等餘各升黜留館有差○癸丑以蔡新爲工部侍郎寶光鼎爲內閣學士○丙辰楊應琚丁憂以鄂樂舜爲甘肅巡撫德福爲湖北布政使同德爲浙江按察使○丁巳諭軍機大臣等前因蔣炳查看黃河隄工情形奏稱河底受淤向無疏濬之法惟有將兩岸隄壩加修高厚等語朕批示此雖無法然兩岸益高束水壩上之策未有不愼事者仍應悉心講求取直去灣俾自行刷汕之法爲庶幾耳究之蔣炳所奏原非目下有亟應辦理之河工不過因親勘河工爲此常談之論而朕之所批亦不過統論治河之道加

高培厚不若取直去灣庶後此遇有應作工處俾知所遵守非令其於此時別開取直去灣之引河也今顧琮蔣炳乃會奏於祥符汛十九堡對岸看得引河一千七百餘丈蘭陽汛耿家寨對岸看得引河一千三百餘丈均應開挖請於霜降後遴員分段償挑等語則是因朕批而生新工矣黃河水勢無常所謂取直去灣不過因勢利導耳若欲於河底開挖引河以待來年汛水開放夫引河有幾許寬深遂能容受全河盛汛乎汛過卽淤工費徒爲虛擲此理甚明人所易曉從來河員樂於工作可圖領帑開銷不講則已講則非濬卽築必有當興之工有如醫者有疾無疾診必有方幸而不爲大害否則削正引邪往往竟成痼疾河工似此無益之費不知凡幾高斌近年經朕指示南河稍知裁制然如前此奏請改運口謂可永無黃水倒漾之患而今歲伏汛仍不免淮弱黃強黃

流入運則所改運口其受益安在顧琮等所奏霜降後興工開挖引河之處竟不必行著大學士高斌於秋汛過後河務稍暇赴豫查勘是否應行開濬或不必要挑挖詳悉審度具摺奏聞蔣炳等摺一併鈔寄高斌閱看凡經管河務之該督撫將此旨一併諭令知之

東華續錄

臣周潤蕃恭校

秋七月己未朔諭軍機大臣等碩色奏查閱黔省營伍摺內古州屯軍一項從前所給屯田不敷日用查看山頭地角尚不無餘隙已飭古州兵備道督勸屯軍將附近山岡畸零隙地勤加開墾等語此事似近理而必不可行屯地與苗疆相錯凡所謂山頭地角附近屯田者皆苗地也既經分設屯糧相安已久一令開墾將來越界占墾無已必有借此侵占苗田生事起釁者若謂屯軍生齒日眾苗人又何獨不然此時雖爲隙地至開墾之後必不甘心爭奪之端由此而起是所補於屯軍者甚微而關係苗疆者甚大不可因屯軍一時之感激而不爲苗疆久遠計也該督身任封疆何

乃見不及此一任屬弁等愆愆遽爾准行殊屬非是已諭開泰令

就近飭該道等卽行停止可卽傳諭碩色知之○癸亥以增壽保

爲左副都御史

由太僕寺少卿遷

○甲子諭今歲熱河熱審減等展至處

暑日止○乙丑和碩簡親王德沛薨予祭○丙寅諭匪徒重利盤

剝旗人發拉林阿勒楚喀種地○辛未顧濟美緣事解任以德舒

爲福建布政使來謙鳴爲福建按察使

由延建邵道遷

○壬申諭刑部熱

審減等加展至雨足後止○乙亥莊親王允祿等議覆禮工二部

會奏 孝賢皇后升祔 太廟 奉先殿一摺按自古皇后祔廟

之禮經無明文然旣葬之後几筵旣撤必祔廟以依神推之后禮

應亦相同查康熙十三年 孝誠仁皇后山陵禮畢升祔 奉先

殿未祔 太廟今 孝賢皇后升祔大禮命臣等再加酌議謹考

據前事以聞得旨 孝賢皇后神主遵照 孝誠仁皇后之例奉

安 奉先殿○丙子命八旗前鋒護軍學習騎射准每年揀選引
見○丁丑 上奉 皇太后啓鑒秋獮木蘭○尙書舒赫德侍郎
兆惠等奏施奕源供伊兄施奕學給看偽橐並飭鈔寄江西與施
奕度閱看及訊之施奕學在京人等並無確證見聞施奕學來京
會試未到應將施奕源暫行拘禁俟施奕學就獲時再行質訊報
聞○己卯免所過地方額賦十分之三○癸未 上奉 皇太后
駐蹕避暑山莊○甲申諭軍機大臣等向聞瀕海地方有行使寬
永錢文之處乾隆十四年曾經方觀承奏請查禁朕以見在制錢
昂貴未令深究且以爲不過如市井所稱剪邊沙板之類仍屬本
朝名號耳乃近日浙省接獲賊犯海票一案又有行使寬永錢之
語竟係寬永通寶字樣夫制錢國寶且係紀元年號卽或私鑄小
錢攙和行使其罪止於私鑄若別有寬永通寶錢文則其由來不

可不嚴爲查究又聞江淮以南米市鹽場行使尤多每銀一兩所
易制錢內此項錢文幾及其半既鑄成錢文又入市行使則必有
開爐發賣之處無難查辦著傳諭尹繼善莊有恭令其密飭幹員
確查來歷據實具奏浙閩瀕海郡縣一併令該督撫等密行查辦
不可因從前之失於查察遂爾稍存迴護並宜鎮靜辦理勿令胥
役人等借端滋擾聲張多事尋尹繼善莊有恭等奏寬永錢文乃
東洋倭地所鑄由內地商船帶回江蘇之上海浙江之甯波乍浦
等海口行使尤多查寬永爲日本紀年原任檢討朱彝尊集內載
有吾妻鏡一書有寬永三年序又原任編修徐葆光中山傳信錄
內載市中皆行寬永通寶是此錢本出外洋並非內地有開爐發
賣之處但既係外國錢文不應攙和行使臣等見飭沿海各員弁
嚴禁商船私帶入口其零星散布者官爲收買解局充鑄報聞

八月己丑朔諭軍機大臣等喀爾吉善等奏稱吳進義傳看偽稟一案據陳公壽沈翼天等眾供如一吳進義看過偽稟百喙難辭既不查拏於前又復捏詞奏辨於後比照知情故縱律量爲末減擬斬監候等語此案初奏到時朕卽以吳進義年老昏憤署中案件文移必不能一一照料其誤從籤套發出自屬情理所有設於彼時據實陳明朕必原情曲宥卽初奉諭旨時自知悔悟據實奏明亦不致罹此重罪乃屢屢具摺強辨到案堅不承認必欲盡情推卸自居無過之地不知傳送交發各有經手原人伊卽倚恃老病而眾供確鑿斷不容掩今旣按律定擬情無可原然朕仍欲格外加恩免其治罪但罪雖可免而終始情節不可不明著將另奉諭旨令吳進義閱看並追詰其實在果曾閱看與否彼之狡供不承者畏治罪耳今旣許以加恩伊若仍不將實情吐出則是全無

心肝敗類之尤矣其另旨且行封存俟訊明後著卽將原供奏聞再爲裁定其案內人犯照擬發落完結○辛卯免長蘆二年至六年商欠○丙申諭在京總理事務王大臣和碩履親王允禩等奏稱初六日主考官房官入簾時於內簾監試御史蔡時田行李內搜出關節二紙外簾監試御史曹秀先認係伊姪舉人曹詠祖筆蹟請交刑部審擬等語科場弊竇自奉 皇考世宗憲皇帝嚴加釐剔內外肅清朕臨御以來留意整飭謂當諸弊盡除人知奉法乃尚有愍不畏死藐法行私潛通關節其人者實出於情理之外蔡時田身爲御史以監試爲職乃受帶關節尤屬不法蔡時田著革職曹詠祖著革去舉人至曹秀先明舉伊姪未必非見事敗露爲先發卸罪之舉亦著解任並案內有名人犯交在京總理事務王大臣會同該部嚴加刑訊切實審擬定罪具奏○壬寅履親王允

禡等覆奏臣等將蔡時田嚴刑鞫訊據供所帶關節二紙原擬入
簾時遇有相識之人相機轉託並非實有其人質之曹詠祖供亦
相同查蔡時田身爲御史奉命監試乃反收受關節串通屬託曹
詠祖奔競夤緣藐法營私情罪俱爲重大均應照律治罪曹秀先
雖訊不知情但於伊姪曹詠祖未能約束應交部議處得旨蔡時
田曹詠祖俱著卽處斬餘依議○甲辰 上奉 皇太后自避暑
山莊巡幸木蘭行圍○丙午諭國家設科取士期得眞才士子誦
法聖賢當知以名節爲重始進不端則爲衣冠中敗類至於列掄
選之任而懷穿窬之心則更衣冠中禽獸矣玷儒林而壞士氣莫
此爲甚是以禁令綦嚴凡使人重懷刑不犯有司正以慎重掄才
大典耳近科來特申懷挾之禁弗令魚目混珠意內簾弊竇久已
肅清不謂尙有潛通關節其人者雖千百人中僅此一二人然此

一二者未嘗非千百中之人况此特其敗露者耳其默識心存無能發摘者謂再無其人其孰信之夫刑章國憲治世之大防從前學政賄賣生童若俞鴻圖喀爾欽皆經正法朱荃未及明正典刑而賊私盡已發覺案犯業俱治罪雖功名之途不無熱中而效尤頽風將何底止吹噓翦拂流爲植黨營私故釣名者甚於市利法所不容朕雖欲曲宥之豈不計及世道人心乎蔡時田曹詠祖已照法司律擬卽行斬決至宦家子弟鄉科以官卷邀恩及會試入闈同年同官情面相關屬託響應勢尤易便身居朝列不以正率先冒犯營私此而不懲更無以服寒畯而昭炯戒曹秀先一併交部嚴加議處科場有此深爲可愧朕固不忍輕量天下士而人人叵測不能無於予改是之歎儻尙有以身試法者流亦惟有按律從事刑茲無赦而已士子讀書立品安命待時力田逢年必有其

候考官盧公秉鑑當念爲國樹人之義何至苟且夤緣甘蹈重辟
卽或倖逃法網而踰牆之醜行已爲人倫所不齒况當光天化日
之下作此如鬼如蜮伎倆自作孽不可逭天地鬼神必不容欺其
可不知所戒哉○己酉諭軍機大臣等吳進義傳看僞稟一事前
經該督撫等審明定擬隨降旨傳諭吳進義令其據實供明今據
莊有恭稱陳公壽史祖賢等隔別嚴訊翻異前供套夾則甘認罪
鬆刑則又復呼冤若不質明終無著落已委蘇松道申夢璽押帶
陳公壽赴浙會審在案等語吳進義之定罪所據者眾證確鑿今
陳公壽等已認復翻此或吳進義教唆證犯令其反覆變幻以明
眾證俱畏刑誣服未爲信讞如此則其情更爲可惡但恐浙省承
審各員附會原參有心周內此亦外省完案之一法在本省牢不
可破而鄰省或有風聞若必符合原參則真情何由而得朕於政

事務得其平毫無成見著傳諭雅爾哈善不得因前經定案稍存迴護況此案亦並非雅爾哈善所參如仍不將實在情節徹底審明惟事委曲完案或欽差大臣前往或提至京中另派大臣質訊明確則雅爾哈善何辭以對朕耶著將此傳諭令其平心靜氣據實研訊奏聞尋奏陳公壽從前解浙會審不待刑訊即將封寄僞稟情由逐細供明嗣因在江翻供經撫臣莊有恭解浙研訊復供吐實情如前並非承審各員有所附會周內臣等辦理此案務求明允固不敢草率推諉亦不敢刑求誣斷報聞○王子尙書舒赫德奏臣接准江督尹繼善咨稱施奕學見在江南供認僞稟來歷係前在京時伊叔施廷皋之子阜保自官學持回給看並稱此案發覺後伊弟施奕源遣家丁陳谷趕赴江西屬其不可供出阜保等語臣隨拘拏阜保並伊弟官學生施純德再四研訊堅不承認

查此案查辦已逾一載各處人犯展轉狹賴無可質對請飛咨尹繼善令將施奕學施奕度劉士祿陳谷等解京對質得旨是令其一路隔別起解不得串供又批汝不無畏難之意此大不可○甲寅諭軍機大臣等施奕學在江南供出阜保給橐及施奕源差陳谷前往屬其不可供出阜保等情此供是實若非實有其事何緣又拉出一阜保此伊親兄弟非誣扳他人可比其施奕源堅不承認則因無人質對且恐與施廷皋有礙此案爲日已久伊早已串定供詞矣阜保尤宜嚴加鞫訊卽堅執不承亦當設法嚴審其官學生豈止阜保施純德二人自當從伊二人逐一追問施廷皋亦必知情卽應傳訊舒赫德豈見不及此總之舒赫德承辦此案初意卽存畏難推託之見今雖奏請將施奕度等解京對質亦非出於本意仍屬取巧推卸此時在江在京各犯俱已串定口供卽解

京亦不過挨延時日耳非實在辦理之道舒赫德非不能辦理此事之人不應如此著派劉統勳會同嚴審早保施純德既係官學生可從官學生追問從前無從蹤迹疑是江西人今既有官學生可尋則又不必論其是江西人與否矣施廷皋著卽解任可傳諭施廷皋伊尙係明白人伊子姪中既有此事伊亦曾追問過家庭聞必得其實在來歷若能將此案究辦明晰得其由來不但原職可復仍當加賞如欲置身事外不從實供明朕親審張廣泗伊所目見回京時卽將伊照張廣泗之例親加嚴鞫其時眾犯供明伊必無從狡飾噬臍何及將此嚴行傳諭施廷皋並諭舒赫德劉統勳將審出情節卽速奏聞劉統勳係特派承審若亦附和推諉豈任用之大臣舉不肯出力耶一併傳諭知之○乙卯諭今歲萬壽恩科各省計偕雲集而中額所收例有定數其下第舉子中有

年力才具可以及時錄用者特予格外加恩揀選引見分別以知縣試用教職銓選俾得早列仕版目今巡幸塞外若俟回鑾再行揀選未免守候需時著在京總理事務王大臣及協辦大學士阿克敦尙書舒赫德劉統勳孫嘉淦於會試揭曉後卽行會同揀選大省四十人中省三十人小省二十人候朕回鑾以次引見其年在七十以上難以復圖進取者並著該部查明具奏候朕酌量加恩仍豫行曉諭各舉子知之

九月戊午朔諭刑部奏羅於朝在監自縊一摺請將司獄提牢等官交部察議此不過循照常例耳羅於朝係有心貽誤軍機擬斬之犯必應明正典刑方足以昭炯戒從前朝審二次情實適值停止句決之年所以未及正法今年朝審屆期此等情實重犯該部自應豫先飭屬嚴加防範乃令得以在監自縊逃於顯戮又僅援

照尋常疏防監犯自盡之例請將司獄提牢等官交部察議殊屬不合該堂官等著一併交部嚴加議處○己未諭外任旗員准留一子隨任餘令赴京挑補拜唐阿○辛酉西洋波爾都噶爾亞國遣使入貢○四川總督策楞提督岳鍾琪奏雜谷土司蒼旺與梭磨土司勒兒悟卓克基土司娘兒吉構釁臣等委員前往剖處蒼旺抗執不遵輒將梭卓所屬土民番寨聚兵攻毀又私造鐵礮潛蓄逆謀查雜谷地方延袤二千餘里爲西南一大部落距舊保縣不遠中有古維州最爲險要今蒼旺擅攻梭卓兩寨若任其吞併一到古維州便可直趨保縣不得不豫爲籌辦見已調兵四千名以三千名分起進發於八月二十二日先遣兵五百名委員以剖斷三家曲直爲名乘虛直搗逆酋寨穴使不得越至古維州餘兵於二十四五六日陸續進攻其一千名檄調松潘鎮帶領於雜谷

西北一帶七布義眉等處截其句通郭羅克之路並檄飭瓦寺土
司選帶士兵隨營調遣臣等卽於二十七八日親往相機攻剿儻
該酋畏罪遠竄而古維州雜谷腦要隘可得卽將番民改土歸流
亦屬一勞永逸得旨知道了餘有旨諭諭軍機大臣等據策楞岳
鍾琪奏稱雜谷土司蒼旺擅行攻殺搶擄又製造軍器逆蹟昭著
見在派兵前往相機進剿等語蒼旺恃其地廣人眾與勒兒悟娘
兒吉構殺掠不服官兵彈壓自應大加懲創以靖蠻疆但四川
兵氣孱弱且當瞻對金川兩次用兵之後元氣未復該提督等務
宜加意慎重必能剋期成功俾苗眾懾服方爲妥協所有一切辦
理情形惟在據實具奏更不得略有粉飾了事之意如從前瞻對
軍情究亦不能逃朕洞鑒也至改土歸流一事不惟不必豫存此
心並語言文告之間亦宜慎密蓋歸流非夷情所願萬一稍有風

聲必致眾情驚駭將人自爲守又成不了之局止應專辦蒼旺爲是計該督提等此時已抵雜谷其見在情形仍令作速馳奏尋奏改土歸流雖屬番民所不願但雜谷番寨皆與保縣居民錯處每須傭工內地以資生計族類雖殊語言可接兼之蒼旺殘刻性成番眾無不受其荼毒是以大兵所至相率投誠先後降番六萬餘丁經臣等派員撫插並令查明戶口田土確數造冊議奏至松岡番寨稍遠將來應否改土歸流俟蒼旺剿滅後另行籌辦臣等見在相機進剿一切軍情惟有據實直陳不敢粉飾了事得旨好佇望捷音又批外省綠營粉飾習氣牢不可破卽汝二人不欺能保眾人之不欺乎○乙丑諭軍機大臣等施奕學一案已令解京質審其施廷翰見在革職在江亦著派員護解來京伊子姪犯案追訊恐伊途次自戕減口著傳諭尹繼善令解員密行防範不得稍

有疏虞○己巳諭軍機大臣等雅爾哈善奏吳進義閱看偽稟一案已供認不諱此案吳進義不過曾經見稟本無大罪因其堅不承認必欲置身事外希圖開復是以愈滋葛藤愈見無恥及見朕寬宥之旨始行俯首無辭其人實屬不堪但念其年已衰老仍著從寬免其治罪至陳公壽供出傳臺於千總孟宗及桃源縣生員邵必勝卽令莊有恭就近提訊嚴行追究務期速得實在來歷毋任狡展吳進義已另降諭旨所有前寄雅爾哈善令與吳進義觀看之諭旨一道於奏事之便仍令繳回卽傳諭莊有恭雅爾哈善知之○庚午 上奉 皇太后駐蹕避暑山莊○癸酉 上奉 皇太后自避暑山莊回鑾○甲戌四川總督策楞提督岳鍾琪等奏雜谷土司蒼旺不法經臣等先後發兵進剿該處地廣民稠必須勦撫兼行蒼旺大頭人拖把忠中沙加豆如等三人分守官寨

臣等前派帶兵先往雜谷之參將六格等於八月二十七日過保縣卽兼程馳抵維州占踞三關要口並一切險隘及橋梁可通之處派兵分守續發之兵亦接踵而至並攻雜谷腦斷其取水之路該頭人拖把等率眾乞降臣等因真偽未辨暫行拘禁其自舊保至雜谷腦沿途各寨臣等選派素與番民熟識之生員商賈等前往招降各番戶於臣等抵營後盡數投誠情願改土歸流又蒼旺攻奪梭磨之九子孟董等寨亦來營投降統計降番一百零六寨見委員弁逐寨犒賞安插查造戶口地土冊籍以定將來輸賦並派官兵前往梭磨招復土司勒兒悟歸寨撫插該管番民臣等見擬領兵前赴松岡進剿得旨此皆卿等素有成竹故所至成功俟題奏到日有旨交部議敘其一切經理尙應妥酌以期邊疆永甯可也又奏據駐紮通化把總盧丕振報稱該處地方有三叉河一

道原與雜谷不通今蒼旺遣人暗搭索橋三處當卽帶兵前往砍斷並拏獲三人審係大頭人忠中派遣修造臣等到雜谷後將拖把忠中沙加豆如等鞠訊據拖把沙加豆如供稱蒼旺一切逆謀惟忠中密與商議是以搭造索橋爲蒼旺運糧之路臣等隨將忠中梟示其拖把沙加豆如等帶往軍營效力贖罪得旨覽奏俱悉諭軍機大臣等據策楞岳鍾琪奏到九月初三四五等日雜谷腦番民盡數來營投降見已分遣文武逐寨犒賞安插等情形一摺辦理頗合機宜前奏到時朕心甚爲懸注不料奏功如此迅速甚屬可嘉俟題到交部議敘已於摺內批示矣至摺中所奏拖把忠中沙加豆如三人皆蒼旺之大頭人爲伊看守官寨而忠中又與蒼旺密謀叛逆何以遽肯隨拖把投降已經來降何以又將忠中梟示此雖已經辦結之案而情節尙未甚明晰可於後摺詳悉具

奏至改土歸流之處更宜妥酌蓋環蜀皆土司地一聞雜谷改流將謂天朝有兼併蠻地之意人人自疑應明示以蒼旺孽由自作覬覦保縣封疆大臣不得已而用兵並非利其土地各土司宜世守疆圉永受皇恩其已經歸附之一百零六寨及將來勦除蒼旺本境或當設官安汛防守控制以爲保縣藩籬且奏中有令生員民人招降之語可知保縣偏近番界若輩爲我用則得其力不然則亦漢奸而已耳此後惟將邊界分畫明晰再不可令內地民人踰此更進番部至梭磨卓克基之地有爲蒼旺侵占者俱應查明歸還勒兒悟娘兒吉方爲大公至正總之辦理邊疆事宜不厭詳慎爲久遠計此番成功眞屬僥倖望外不可更生冀倖惟期番境永甯無事斯善矣將此諭策榜岳鍾琪知之園中所得鹿肉各賜一分由驛發往尋奏忠中常官兵進勦雜谷時伊獨倡議固守並

調土兵協力抵禦及拖把沙加豆如等見勢危迫欲將忠中擒獻
伊始隨眾出降是該犯之降旣出於眾人之迫脅而附逆助謀其
罪尤大是以卽爲梟示至蒼旺恃勢虐鄰土司中久爲側目一聞
逆酋就縛皆以除害爲快尙不致於生疑保縣本與番寨接壤民
人往來稽察難周今雜谷旣列版圖古維州天然險要卽於此盤
詰奸匪則私越者自可杜絕其蒼旺所奪梭卓兩處地土業經查
明歸還臣等此番用兵實因逆酋悖逆不法幸迅速成功已出望
外又何敢更生冀倖得旨此事究屬冒險而乘易然旣已成功諸
凡皆不必論若朕以兵爲可試則將令汝等乘勝移師問郭羅克
之抗命不法矣○乙亥諭今年舉行萬壽恩科禮部會試士子
雲集其中有年臻耄耄尙與觀光者雖未經入彀而龐眉鶴髮偕
試禮闈亦場屋中人瑞也所有八十以上之徐文靖侯勤王暨周

中規俱給子翰林院檢討職銜七十以上之張簡杜繼衍任湖趙
居祿邸釗周士梁張明極何魯李熙鐸林玉藻俱給予國子監學
正職銜見任學正王延年著該部帶領引見再降諭旨用賁殊恩
以光盛典○諭各省由立決改爲監候人犯均係服制攸關其改
擬監候已屬原情酌減若於秋審時入於緩決則減之又減殊非
慎重倫常明刑弼教之道是以上年降旨令槩入情實此其中情
節多端如父母被毆致傷或勢在危急救護乃其至情使父毆叔
而子助父以斃叔亦得謂之救父則是長不友不睦之風非止辟
之意但散在各省招冊中有句決者有未句決者或未悉朕輕重
權衡反滋疑議著該部將此等案犯查明彙爲一冊與官犯招冊
俱先期進呈候句其有應宥者亦可卽予減等發落朕於各省招
冊反復研究務協理法之大中人命至重大德好生何忍不以哀

矜爲念但飢法違道務在活人斯乃婦人之仁中外問刑者共知之○戊寅減甘肅張掖等五縣偏重地畝額賦○己卯 上奉

皇太后還京師○庚辰協辦大學士吏部尚書梁詩正奏請終養允之○以孫嘉淦爲吏部尚書協辦大學士汪由敦爲工部尚書○辛巳調王濱爲戶部侍郎蔡新爲刑部侍郎張泰開爲工部侍郎○甲申諭本日句到情實官犯內李爲棟王瑞霖二犯因賄屬朱荃爲伊子營求入學本按以財營求與受財人同科問擬絞候已屬該部輕爲出脫至策楞擬以緩決更屬沽名曲庇著交部嚴察議奏蓋入學乃士子進身初步原與科場一律營求賄屬之風斷不可不嚴爲防範在輦轂之下糾查嚴密易於敗露至各省學政出京赴任途次接見官員乘便密行賄託其事甚易孰能稽察似此情罪昭著犯證確鑿之案若不明正典刑將來玩法之徒益

無忌憚且今歲科場搜出關節既伏厥辜至殿試策名大典復有豫擬策條懷挾應試者條對策問若僅完卷塞責較之三場乃甚易之事尙需宿構懷挾則其鄉會中式時之舞弊不問可知朕特未加深究耳可見衣冠中不少敗類實出尋常意料之表敗露者如此其僥倖入彀者益難信其必無矣比聞新進翰林輩視交通關節竟不以爲惡習可恥偷爲一切真材益淪力挽頽風朕不辭也此而可寬明刑弼教之意安在李爲棟王瑞霖二犯已於秋決內子句正法並將此嚴切曉諭中外知之○丁亥召尹繼華來京以莊有恭署兩江總督○是月四川總督策楞提督岳鍾琪等奏梭磨所屬之嗎爾密等處流番經臣等招復該土司勒兒悟回巢撫插旋因蒼旺攻圍卓克基官寨甚急並檄令梭磨遣兵救援該逆酋聞雜谷腦已失退守巢穴都司本進忠等帶領土兵從後追

擊賊番敗回巴爾康駐營拒守臣等見抵卓克基俟確探形勢卽
行進勦報聞尋奏臣等偵探蒼旺巢穴在山岡險隘之區碉寨鱗
接而北路山頂一泉係其取水之路因分兵三路進勦北遣遊擊
李華等攻克達凹山梁直至山頂絕其水道南派副將額僧格等
攻取大小戰碉七座並招撫番寨數處中路令副將李中楷帶領
先鋒官兵前驅奪卡臣等率領大隊併力攻擊連日奪取碉卡二
十餘座直逼賊巢並令通事人等曉諭番眾有投誠者卽從寬免
賊番相率乞降蒼旺勢窮就縛見在牢固禁守候旨獻俘得旨欣
慰覽之蒼旺不值獻俘卽於軍前正法以儆番眾可也卿等已有
旨交部議敘茲可將一切事宜悉心妥議務期番疆永享敕甯之
福副朕綏靖之志卿等其共勉之

冬十月戊子朔賜泰大士等二百四十一人進士及第出身有差

○召鄂昌來京以鄂客安署江西巡撫楊應琚署山東巡撫

原任甘肅

巡召丁廷讓來京以阿桂署江西按察使

由部

○庚寅軍機大臣

議覆四川總督策楞提督岳鍾琪奏稱番眾苦蒼旺殘虐投誠者

四萬餘人悉願改土歸流其已入版圖之雜谷腦等處應築城並

設副將理番同知各一員兵一千二百名雜谷腦之西南係梭卓

接壤均須建汛設兵查威茂營舊制原係參將今應仍改參將卽

將該協副將移駐雜谷腦均歸松潘鎮管轄兵卽以威茂所裁並

通省各營通融抽撥同知亦有瀘甯一缺可以裁改並照松潘同

知之例增設照磨一員統於善後事宜內分別籌辦等語其改設

副將移駐同知撥兵設汛之處均應如所請至築城大興工役恐

遠近諸番聞而駭異將以問罪興師之舉疑爲利其民人土地殊

非鎮靜之道應無庸議從之○辛卯諭軍機大臣等江蘇巡撫莊

有恭陳奏捕蝗諸弊因向無責成地主舉報之例撲捕踐踏雖酌給工本而農民恐得不償失希延至飛躍即可移禍鄰田又百姓恃有雇夫撲捕之例見蝻不肯自捕及應募受值又虛應故事冀日領錢文因以爲利及設法收買又見蝻不肯卽報待至長大捕賣多得錢文請嗣後民地俱責成地佃巡查撲捕議定成例等語從來有一例卽有一弊向因蝗蝻貽害田禾立法撲捕自守令以至督撫責成定例綦嚴乃因嚴於參處而農民中狡黠之徒詐僞叢生奸弊百出莊有恭所奏種種情形皆所實有但此皆有司應行查辦之事如該督撫實心督率該屬員實力奉行則有蝻孽而田主不報夫役受值而撲捕不力豈有不行懲責之理若必事事著爲成例三尺法其可盡耶億萬戶能盡曉耶但當蝗蝻舉發之時奸徒叵測必有謂因捕蝗而責百姓執成例以煽惑愚民由此

抗官滋事者該督撫應先期化導曉諭俾愚民共知其詭譎情狀有司皆所洞悉則自不敢犯犯而責之亦不敢抗此自在奉行而不在定例將此傳諭各督撫知之○壬辰禮部議准御史常海奏內場監試等官雖無衡文之責然場務俱係經辦嗣後內場監試及提調知貢舉等官其子弟亦應一體迴避從之○甲午以李治運爲安徽按察使由湖北糧道遷○壬寅諭阿思哈奏稱山西蒲解等屬被旱偏災平陽紳衿耆庶人等捐輸銀兩就近解交河東道庫以爲加賑銀穀兼散之用等語此奏殊爲卑鄙錯謬之至朕實駭聞直省偶遇偏災地方殷實之家樂善好施或自出家廩積貯或出己貲糴運米石散給貧民功令原所不禁惟具數報官量加優敘以爲閭閻任恤者勸耳並非斂貲貯庫藉以助賑也國家賑濟蠲緩重者數百萬兩少亦數十萬兩悉動帑庫正項從無顧惜地方

富民所捐幾何貯庫助賑殊非體制此端一開則偏災之地貧民既苦艱食富戶又令出貲國家撫恤災黎何忍出此深負朕痼癢一體之意阿思哈著交部嚴加議處所捐銀兩著發還聽該紳衿等自行辦理○召阿思哈來京調定長爲山西巡撫以李錫秦爲廣西巡撫

由布政使遷

○癸卯

上詣

溫惠皇貴太妃宮祝七旬壽

○軍機大臣等議覆四川總督策楞提督岳鍾琪奏稱松岡投誠番民一萬餘口應按寨分設撫夷掌堡並擇番目內素爲番眾信服者設爲土守備千把以備調遣等語查雜谷本吐番苗裔自唐宋以來世守其土明代授爲安撫司康熙十九年率屬內附仍予舊封未便以蒼旺一人悖逆遂致亡其世守應飭該督提另擇蒼旺近屬內伯叔兄弟一人素爲番民信服者授爲土司所奏應毋庸議得旨依議速行○甲辰以台柱爲廣西布政使

由江蘇按察使遷

○

乙巳諭圖爾炳阿前在雲南巡撫之任不能實心察屬代爲彌補
部議照監守自盜治罪但尙與焚索肥瘠者有閒著加恩從寬釋
放○以許松佶爲江蘇按察使

由安徽鳳道遷

○丁未賜哈廷樸等六

十五人武進士及第出身有差○己酉 上謁 東陵並臨送

孝賢皇后梓宮安地宮啓鑾○辛亥調德爾敏爲工部侍郎

由戶部調

○壬子 上謁 昭西陵 孝陵 孝東陵 景陵○甲寅 上

臨享殿移 孝賢皇后梓宮安地宮

東華續錄

乾隆三十七

臣王先謙敬編

臣周綸蕃恭校

乾隆十八年癸酉春正月己未以國子監助教曹洛禪年逾大耋授司業額外行走○辛酉諭軍機大臣等據鄂客安奏查審傳鈔偽稟之盧魯生一案係南昌衛守備劉時達給與隨提訊劉時達據供十五年七月伊子劉守樸前任浙江金華縣典史時在家書內封寄並供劉守樸業已告病回廣東原籍等語看來此案傳稟年月較他案爲最早似於根株漸近所有供出之劉守樸或係聞風畏罪先期託病潛回亦未可定劉守樸前在金華既傳此稟則金華地方必有偽稟蹤迹必得幹員前往訪辦庶能得其根柢著將供單鈔寄莊有恭雅爾哈善令其卽派承辦此案之周承勃錢

度速往該處密行確加訪查辦理應拏問者卽著拏問令其從權行事並將劉守樸從前在浙係於何時告病回籍及是否實係患病或係捏詞該地方有無僞稟傳播之處一併詳悉體訪務須得其確據不可稍有疏漏再供單內劉守樸之長隨王玉琳旣係寄信到江之人亦屬要犯著莊有恭等一併嚴行查拏務獲速卽解京周永勃錢度此案許其具摺由驛遞奏以期迅速○戊寅諭總督策楞阿里袞見在丁憂四川總督印務著黃廷桂署理陝甘總督著尹繼善署理兩廣總督印務著班第署理尹繼善班第俱著馳驛速行前往江西巡撫鄂容安著署理兩江總督印務卽著在江西辦理○辛巳諭各省傳鈔僞稟一案朕屢經降旨宣示中外此等奸徒傳播流言其誣謗朕躬者有無虛實人所共見共知不足置辨而講張爲幻關繫風俗人心者甚大不可不力爲整飭乃

各省督撫僅視爲尋常案件惟任屬員取供詳解過堂一審卽爲歸案了事以致展轉蔓延久迷正綫各省就案完結情形大略不過如此而在江西爲尤甚卽如施廷翰案內之張三施奕度江西承審各官草率錯謬及到江南亦不能審出實情幾認爲捏造正犯經朕命軍機大臣等審明昭雪而干總盧魯生在江西兩次到案俱被狡飾脫漏又經軍機大臣等從解京之書辦段樹武彭楚白等供詞互異之處細加窮詰始將干總盧魯生守備劉時達傳稟情節逐層究出比盧魯生劉時達先後到京朕督令諸臣虛心研鞫反復推求始則借端支飾繼則混指同寅旣不能推卸傳稟實情又不能供得稟來歷詰問再四卽各委之伊子忍心害理莫此爲甚迫情竭詞窮始將其會商捏造種種奸僞情節並將僞稟條款逐一默寫及其造謀起意於破案後商同借綫掩飾情由一

一吐露矢口不移當此光天化日之下乃有此等魑魅魍魎潛形
逞僞竇出情理之外今不待重刑供情俱已確鑿殆由奸徒罪大
惡極傳鈔貽累多人好還之道自無所逃耳慮魯生劉時達著議
政王大臣大學士九卿科道會同軍機大臣再行詳細研鞫定擬
具奏至督撫爲封疆大吏不特此等大逆之犯卽尋常案件孰非
民生休戚攸關而養驕飾僞妄自託爲敦體可乎此案若查辦之
始卽行竭力根究自可早得正犯乃竊率苟且江西舛謬於前江
南迷誤於後均無所辭咎江西近在同城羣衛弁騰口舌藉毫無
顧忌串供借綫幾於漏網吞舟厥罪較重於南省解任巡撫鄂昌
按察使丁廷讓知府戚振鷺俱著革職拏問交刑部治罪總督尹
繼善及派往江西同審之周承勅高麟勳俱著交部嚴加議處錢
度朱奎揚等尙與專委承辦者有閒俱著交部議處至衛弁乃總

漕專責瑚璉亦不能辭責亦交部嚴察議奏當日查辦之始未知
根源所在須披葉尋枝勢不得謂法不及眾畏難中止以致顛預
了事朕猶恐拖累者眾屢經密諭各省督撫分別發落以省拖延
卽武弁大員曾經私看者亦悉置之不問然在伊等食毛履土見
此大逆不道之詞當爲痛心疾首譬如聞人詈其父祖轉樂爲稱
述非逆子而何然使非有首先捏造之人則伊等亦無從傳聞是
傳聞者本有應得之罪不可謂被所愚弄而朕則憫其無知譬子
雖不孝父不忍不慈今首犯旣得不妨曲宥除在京人犯已予省
釋外著傳諭各省督撫通行出示曉諭無論已未發覺槩行從寬
免究釋放凡屬此案例應擬罪人眾蒙朕格外寬宥務宜痛自改
悔動尊君親上之天良戒造言喜事之惡習庶不至良苗化爲稂
莠永受朕保全愛養之恩夫說說殄行爲聖世所不容奸頑不除

則風俗人心何由而正而吏治狃於因循尤關治道朕宵旰憂勤與諸臣共相敦勉者豈可稍存姑息致啓廢弛之漸將此一併宣諭中外知之○壬午諭捏造僞稟正犯已經審明原任糧道施廷翰及伊子賈生施奕度等俱著加恩開復○命莊親王允祿履親王允禩和親王弘晝爲議政大臣○乙酉免山東章邱等三十一州縣衛厯年帶徵額賦○丙戌諭豫給明年滿漢臣工春秋俸銀之半

二月丁亥朔命謁陵扈從官員春季俸米全給其扣項展限一

季○以徐以烜爲內閣學士

由唐事遷

○壬辰

上啓鑾謁

泰陵○

免鳳陽中衛旗丁舊欠○甲午諭富勒赫著以布政使銜前往江南隨大學士高斌學習河務○丙申上謁泰陵○丁酉皇太后自暢春園啓鑾○戊戌諭軍機大臣等舒赫德奏盧魯生見

在病勢沉重請速正典刑一摺早聞鄂客安奏到劉守樸供情曾傳諭大學士來保等再將劉時達詳加詰訊想亦不過一二日之事如盧魯生尙在可待俟覆奏到日再行降旨如或病勢迫不及時則該犯本屬必當明正典刑之人卽著在京軍機大臣會同議政王大臣大學士九卿等一面將盧魯生押赴市曹凌遲處死一面進本題達其劉時達或應俟劉守樸到京後再行酌量辦理但據鄂客安奏稱該犯見亦病重其能到京與否亦尙未可知已令軍機司員前往途次密飭防護矣一併傳諭知之○己亥 上詣金太祖世宗陵行禮○ 皇太后駕至涿州 上詣 皇太后行宮問安駐蹕涿州○壬寅 上奉 皇太后御舟至蓮花淀閱水圍○免經過地方本年額賦十分之三○癸卯 上奉 皇太后御舟至和樂淀閱水圍○命各省疆吏於所屬州縣內保舉堪

勝知府人員○乙巳 上奉 皇太后御舟至池魚淀閱水園○

丙午 上恭送 皇太后啓鑾回暢春園○丁未命兆惠赴藏辦

事以夢麟署戶部侍郎

由內閣學士署

○戊申 上御舟閱永定河工○

諭前經降旨部院堂官稱職與否久悉朕懷自可隨時黜陟京察

之年停其自陳四五品京堂特派王大臣秉公分別去留奏聞引

見至三品堂官則非尙書侍郎比也今既不令自陳轉得以散地

容其濫竽可乎其令吏部於京察時將伊等事實另繕清摺進呈

候朕親爲裁奪○己酉 上閱新夏口隄工命沿河居民毋侵占

隄身○命巡幸地方臺站派武弁馳送每十日報部一次○庚戌

上幸南苑行圍至甲寅皆如之○壬子刑部議覆廣東巡撫蘇

昌奏稱曲江縣民陳茂菖戳傷小功服叔陳丙林身死按律擬斬

立決應如所擬其聲敘救母情切之處臣部仍照例題請得旨陳

茂蘭著卽處斬此案陳丙林與陳氏互毆已受多傷該犯勢非危急託言救護輒將服叔棍戳致斃前經降旨以父毆叔而子助父以斃叔不得謂之救父此正母毆叔而子助母以斃叔不得謂之救母者也蘇昌聽屬員姑息率請聲敘長不睦之風非止辟之意著交部察議具奏餘依議○癸丑諭傳鈔僞稟一案前因劉時達在江西供係伊子劉守樸從金華縣典史任所封寄隨經降旨令周承勃錢度前往該處密查確訪嗣經王大臣等審明僞稟卽係盧營生與劉時達同謀捏造奏請按律定擬其日適據周承勃等奏稱究出劉守樸寄送僞稟家信係伊幕友孔則明代寫其稟係伊妻舅吳姓自蘇州帶來等語朕以此案雖經王大臣等會同再三研鞫毫無疑竇但讞獄之道不厭詳慎孔則明旣供有封寄僞稟之說亦當窮其虛實未便因劉時達已經自認爲造稟首逆卽

槩置之不問是以諭令周承勃等帶犯來京覆加質審此朕明慎
用刑之至意今軍機大臣等審明孔則明代書寄家信之處全
屬子虛實因署金華府知府查延掌將封寄情節說與孔則明令
其自認以致該犯初到案時卽畏罪附和誣認說供及周承勃等
覆訊又因該犯所供與該署府詳送親供相合卽遽信有傳稟實
情今旣反復推求供情確鑿是劉時達同謀造棄及串合掩飾情
罪全行昭著無可候質著議政王大臣大學士九卿科道卽行會
議按律定擬具題完結周承勃錢度前因於施奕慶等一案辦理
錯謬特令隨總督尹繼善來京於在京王大臣會審時令其在旁
看視目擊在京諸臣查審情形朕謂該道等必當痛自改悔消除
外省審案積習今於此案復止據該署府詳送親供草率成案甚
失朕教誨成全之意而該署府查延掌於此等重案並不實心推

鞠一味誘供混詳希圖定案不稱司牧之任周承勃錢度查延學俱著交部嚴加議處莊有恭身任封疆於一切刑名案件自當虛公研究今於吳剛一犯不無因其籍隸廣東過存避徇之心反有周內之迹封疆大吏豈宜如此亦著交部察議○命八旗都統等官軍政兵部具奏請旨○乙卯 上還京師

三月戊午諭刑部議駁外省題達案件經督撫遵駁改正者司員得並邀議敘夫指駁案情必有首先立議之人乃將各員通行議敘其中隨同畫案並學習額外之員均得濫邀敘錄非覈實之道且由刑曹升調別衙門者恃有加級紀錄可以抵銷往往不肯認真勉力辦事因思吏部司員向因議處之案較多於別部僅將承辦之滿漢司員各一人開送議處此雖非正例然以吏部議罰可以通刑部議敘其於考課之法方爲平允嗣後刑部各司遇有因

題駁議敘者著照此旨行○己未諭藩臬兩司履任三年屆滿請旨陛見乃古述職之意朕得隨時察看以備簡用其奏請未經允准次年以後每年俱應復行具奏若又待三年之期是六年矣近來各省藩臬中具奏之例多未畫一該部可通行傳諭嗣後均照此旨行○庚申軍機大臣刑部奏捏造偽稟一案先經雲貴總督參奏展轉追至江西傳鈔之江錦章遞究至彭楚白經江撫審擬彭楚白得稟於段樹武發落完結臣等因案情可疑將傳鈔授受未明之段樹武彭楚白等請旨行提到京詳細推究據段樹武供稱實未給稟曾經彭楚白告知伊另有得稟來歷及研訊彭楚白始供係伊本官撫州衛千總盧魯生給稟傳鈔所供得稟於段樹武實因盧魯生之次子盧錫榮屬令隱瞞等情隨提盧魯生審訊詰其得稟來歷初供係伊次子盧錫榮不知從何處鈔來迨再三

究詰忽供係伊在贛州衛千總李世璠處得橐於永新所千總石
憲會忽供得橐於南昌衛守備劉時達並稱係劉時達之子劉守
樸任所寄來因其言語支離反復開導始據該犯供認自行起意
與劉時達商謀捏造緣該犯係四川南部縣人曾任長淮衛守備
緣事降調千總乾隆十五年七月內在劉時達家慮及辦差賠累
妄希停止巡幸與劉時達編造奏橐湊成五不解十大過名目復
思孫嘉淦肯上條陳借名聳聽於各幫會議公事時給眾閱看交
書辦彭楚白鈔傳旋據劉時達供係廣東海陽縣人見任南昌衛
守備於乾隆十五年七月內盧魯生起意捏造偽橐一時聽從編
湊當經盧魯生取去給人鈔傳從前所供兒子劉守樸金華寄來
實係自知罪重希圖推卸一一供認不諱盧魯生業經先行正法
其通同捏造之劉時達應照不分首從律凌遲處死盧魯生之子

盧錫齡盧錫榮均應斬立決緣坐家屬及見棄不首之犯均按律分別定擬得旨盧魯生劉時達二犯商撰僞奏肆行傳播其誣謗朕躬凡天下臣民自所共曉不足置論而當此承平之時乃敢作僞逞奸搖惑眾聽其貽害於風俗人心者甚鉅自應並置重典以昭炯戒但劉時達提解來京一經研訊卽將與盧魯生商謀僞撰及從前串供捏飾情節逐一據實供認且伊子劉守樸係患病垂斃之人該犯亦何難堅執江省初供以希狡卸而王大臣等再三詳鞫始終自認不諱此可見其天良猶未盡昧矣朕君臨海宇刑賞一秉至公從無絲毫成見盧魯生起意捏造實爲此案罪首已經先行正法劉時達著從寬免其凌遲處死改爲應斬盧魯生之子盧錫齡盧錫榮亦著改爲應斬俱監候秋後處決其劉時達家屬之應行緣坐者俟解京之日該部另行請旨○癸亥諭軍機大

臣等審訊陳公壽傳送偽稟一案不獨由報封發之事全屬誣枉而陳公壽亦始終並未見稟無怪乎吳進義從前之堅不承認也浙省辦理之初未免以事涉同省大員恐蹈瞻徇遂專向吳進義追求過於周內而吳進義於喀爾吉善等參奏之後屢摺奏辨迹似膺受卽如武進陞有檢舉孫鼎元稟送偽稟之奏安知吳進義未經見稟伊屢任提鎮身受厚恩見稟之罪尙輕欺隱之罪甚重且據該撫節次具奏又俱持之甚堅是以將伊革審殊不意其悉屬子虛也若非陳公壽在江翻供經莊有恭奏請覆訊豈不竟成冤獄外省審讞之案非遷就草率虛應故事卽豫存意見不能虛心推究實情此等陋習牢不可破雅爾哈善係屢次獲譴之人加恩錄用膺封疆重寄宜倍矢實心以圖報效不應仍復如此且其審理此案多據承審各員錄供稟報亦未逐一親加詳鞠尤非愼

重之道著交部嚴加議處將來若再不痛自湔洗惟有重治其罪而已其浙省承審官查明一併交部嚴察議奏至吳進義如果見棄屬實既不查拏於前又復掩飾於後自難辭咎今既審屬無辜又豈可以已經寬宥遂不予昭雪況武進陞不過令其休致吳進義並未見棄是不但無罪亦且不應廢斥矣著該部行文調取來京引見另降諭旨朕經理庶務至公至平毫無成見必不以曾經奏結之案稍有迴護嗣後各督撫凡遇一切刑名案件各宜一秉虛公務臻平允副朕此意可通行曉諭知之○和碩康親王巴爾圖薨予祭葬諡曰簡○庚午諭阿桂著來京補授內閣侍讀學士其江西按察使員缺著范楷補授○酌減山東等省鄉試房考官○壬申戶部議准湖北巡撫恆文奏恩施縣外屯一處距郡城四百餘里在川省巫山奉節建始三縣之中屯民五百餘戶遇一

切公務必越建始往返旬餘實爲不便從前改衛爲縣時建邑尙隸川省是以未及議歸今建邑已改隸施郡請將外屯一處改建始縣管轄從之○乙亥 上親耕藉田○丁丑命八旗軍器三年查驗一次○己卯召永常來京以開泰署湖廣總督定長署貴州巡撫○壬午允蔡新乞假省親以李因培署刑部侍郎

由內閣學士署

以雙慶爲內閣學士

由祭酒遷

夏四月己丑西洋博爾都噶里雅遣使巴哲格伯里多瑪諾入貢

奉表言臣父昔年仰奉

聖主

聖祖皇帝

世宗皇帝備極誠

敬臣父卽世臣嗣服以來纘承父志敬效虔恭臣聞寓居中國西

洋人等仰蒙

聖主施恩優眷積有年所臣不勝感激歡忭謹遣

一介使臣以申誠敬因遣使巴哲格等代臣恭請

聖主萬安並

行慶賀伏乞

聖主自天施降諸福以惠小邦至寓居中國西洋

人等更乞 鴻慈優待再所遣使臣明白自愛臣國諸務俱令料

理臣遣其至京必能慰悅 聖懷其所陳奏伏祈採納得旨覽王

奏並進方物具見惻忱知道了該部知道○己亥以麒麟保雷欽

俱爲左副都御史

俱由通政使選

○甲辰諭各省鄉試向例巡撫入闈監

臨前因封疆職守綦重曾經降旨將專駐巡撫省分令於藩臬二

司內酌委一員入闈監臨巡撫止於點名時督同接查本屬因地

制宜之意但思士子屬闈考試人數眾多又有執事之武員兵丁

等均須約束恐藩臬尙不足以資統理且如江蘇安徽二省見據

鄂容安奏稱藩臬事務最爲繁多不便行調入闈等語嗣後該二

省俱著仍照舊例行其餘專駐巡撫省分亦仍令巡撫入闈督率

彈壓俟三場完竣後卽行出闈交與所委之司員在內辦理庶關

防嚴肅於地方場務均昭慎重○乙巳諭盛京戶刑工三部郎中

八缺著留戶部一缺用本處人員餘七缺並員外郎十六缺主事
十七缺均以京員補用禮兵二部郎中四缺主事五缺均用本處
人員員外郎八缺著以京員補用兵部一缺餘七缺留用本處人
員○丙午以旱命刑部清理庶獄減徒以下罪直隸亦如之○丁
未 上詣 黑龍潭祈雨○壬子命湖廣總督永常護軍統領努
三馳驛前往安西並頒給欽差大臣關防○甲寅大學士等議奏
查乾隆十七年經禮部奏祈雨 告壇自乾隆七年始增用樂與
一應祇告不作樂之例似未畫一請停止今面奉諭旨祭禮用樂
以導和氣而格神祇乃事神之禮與齋戒撤懸自致誠恪其義各
異且樂足以宣通陰陽之氣祈雨致祭仍以用樂爲是請飭禮部
嗣後祈雨 祭壇遵用樂再查乾隆七年議定祈雨儀注 太歲
壇所用乃歲祭通用樂章與祈澤之義無涉應交樂部另行撰擬

載入會典得旨是尋撰進樂章六奏迎神奏需豐之章初獻奏宜豐之章亞獻奏進豐之章終獻奏協豐之章撤饌奏應豐之章送神奏洽豐之章

五月丙辰朔裁欽天監滿漢監副各一增西洋監副一○禮部議覆陝西布政使張若震奏各省舉行鄉飲酒禮事不盡一應請嗣後每歲十月中舉行一次紳士內舉一爲大賓耆庶內舉一爲介賓一爲耆賓詳准督撫各衙門咨部存案如舉鄉賓後其人有犯卽詳斥並報部除名查順天鄉飲每歲於孟春望孟冬朔舉行各直省亦應遵例於正月十月舉行二次至賓介之數儀禮有大賓介賓眾賓及遵會典鄉飲酒圖有大賓介一賓二賓三賓眾賓一饌二饌三饌未有云耆賓者該布政使所稱舉一爲耆賓之處無庸議至遵饌義同乃公大夫之居鄉者來助主人以樂賓有則備

無則缺可也。應令地方官察實舉報。仍將賓介開具名籍送部存案。如舉後有犯應如所請咨部除名從之。○己未命侍衛拜雅爾往天津祈雨。○癸亥減朝審秋審各犯緩決三次以上人犯罪。○戊辰命督撫參劾人員摘印後卽訊。○癸酉諭獄重案敕交三法司覈擬原期詳慎以昭平允。其事屬眾議僉同。固成信讞。如或迹涉兩是閒。有一二人不能盡歸畫一者。自不妨各抒所見。候旨酌奪。向來原定有不准兩議之例。今據左都御史梅穀成於召對時奏稱。近年法司辦理刑名。每以兩議爲諱。朕前因刑部都察院每各持意見。彼此分明。竟成兩衙門相角。此實惡習。有關政體。是以降旨訓諭。而乾隆六年大理寺少卿周倓因奉有訓飭諭旨。遂奏請畫一具題。夫獄一成而不變。案情律意推校不憚周詳。要歸一是而已。固不得逞其偏見。擴臂相爭而避立異之名。苟且附

和亦豈國家設官集議之本意且懦黠者轉得藉口以爲蒿目無策嗣後三法司覈擬重案如有一二人意見不能相同者原可兩議具題但不得合部合院各成一橐朕欽恤庶獄不厭博咨諸臣亦當悉祛成見勵乃靖共將此通行曉諭知之○丁丑諭瞻對案內革職問擬之總兵袁士弼前已降旨減等發落覈其情罪猶有可原且久歷行閒精力尙堪驅策著加恩以參將用○戊寅諭直省查驗兵丁務覈實毋粉飾外觀○諭嗣後各省奏留人員如遇丁憂事故起復之日俱著仍往升任省分候補○癸未諭軍機大臣等據成衮扎布等奏稱今春喇嘛達爾扎發兵往哈薩克征伐達瓦齊伊兵轉與達瓦齊合結連哈薩克兵將喇嘛達爾扎拏獲達瓦齊卽爲台吉又有準夷察罕宰桑帶領將及百人向南逃走等語朕思準夷性多奸狡或知我防範故捏造此言使人傳播實

隱爲窺伺之計亦未可定至察罕卒桑如果向南逃走別無去處
必至安西可傳諭永常等如彼帶人投我邊界詢實情節一面具
奏一面照薩喇爾之例送京此時各卡仍應嚴加防範不可疏忽
六月己丑諭守令以親民爲職務必其與民相浹洽然後能勸農
桑興教化非謂簿書期會無誤卽云勝任也邇來守土之官不過
奉行教令於錢穀刑名是較督撫以此課有司部院以此課督撫
或拘牽文義毛舉瑣細往返駁詰案牘滋繁議者至謂地方有司
救過不暇奚能留心民生休戚斯言近是然一再更張將無藉口
優游其不留心民生休戚如故則何以別有司賢否乎然案牘繁
滋亦非敷政之要務也應如何酌歸簡易俾庶政不病瑣屑而親
民者有教養之實及民則得矣其令九卿科道直隸總督及督撫
因事在京者詳悉定議以聞○庚寅諭 皇考世宗憲皇帝時因

朝臣與諸王交接往來曾經降 旨訓諭深戒黨援用以防微杜漸垂示方冊最爲深切著明所當永遠恪守朕臨御以來意諸王大臣自必懍遵 聖訓慎持防檢是以未經特頒諭旨乃諸王中一二節遜者竟有招納之事而大臣中亦有在王府往來者如此因循則 皇考整飭風俗防弊遏邪之苦心及朕而卽弛朕甚懼焉且如旗員素隸王門下者本自不禁其非本門及漢大臣則全無交涉設有政務何妨公言朝省奚僕僕私謁爲耶歲時投刺卽開促膝密談之端形迹未絕保無掣肘顯爲之事且其意將以此爲榮耶抑別有所爲耶甚無謂也日久漸忘人或藉口其令各部院及八旗衙門各錄朕此旨一通於壁席諸臣觸目警心遠嫌自重其或再犯被人糾參朕將執法從事毋謂不教○癸巳以策楞署兵部尙書

原任四川總督

○丁酉諭各省審理參案前已敕部嚴立限

期但督撫題參屬員卽款蹟昭著不過摘印看守必俟奉准部文始行提訊若雲貴等省往返已逾數月是於未起限之先已稽延半載矣且從來督撫參員斷無懸擬其被屈不令審究之理是參則必革昭雪須俟審明白以速審速結爲是然大員或慮體制攸存嗣後文職道府以上武職副將以上仍照舊例於題參得旨部文到日再行提訊部文亦著速行其餘文武官員於具題日卽將案內應質人犯拘齊審究如督撫同駐省分一面具題一面行知應承審衙門照例提審庶是非早辨案牘易清著爲令○癸卯以衛哲治署兵部侍郎

原任安徽巡撫

○乙巳諭山東布政使李渭以失察

案內降級從寬留任具詳該署撫代爲奏謝藩臬原得具摺奏事豈有他事皆可入告而陳謝反不可耶向日兩司有喜事瀆奏侵督撫之權挾制傾陷者經朕訓飭此風雖改而未免矯枉過正又

有過於畏忌緘默藏拙甚至具稟蒙批皆向督撫呈覽者靖共之意安在著該部通行傳諭知之○丁未諭福建按察使來謙鳴來京陛見奏稱伊前任廣東運使任內因廣東布政使及運使衙門向有值月鹽商陋規五千兩曾面稟督臣策楞欲行裁去督臣諭以運使有承辦戰船須此項津貼何必遽行裁革彼時雖未具詳明裁實未收受等語朕以運使衙門雖經伊裁去而尙有布政使陋規此不可以不問及詢策楞始知此項陋規前任督臣久行裁禁來謙鳴並未向伊稟裁等語因令軍機大臣傳來謙鳴面質乃伊言語枝梧至有並未奏及此事之語伊未奏及朕何由而知殊不意挾詐面欺世閒竟有如此鬼蜮其意以爲在朕前獨對朕亦未必復加詳察或者默識其廉獎擢皆未可定殊不知朕豈易欺者哉居心如此實爲僉邪之尤來謙鳴著革職伊前在雲南知府

任內尙有未完之項著各省差員遞行押往雲南著追完日該督撫具摺請旨○戊申以劉慥爲福建按察使

由江南常
集道遷

○王子禁

滿洲官員居住外城